



Province of the  
**EASTERN CAPE**  
EDUCATION

**NATIONAL  
SENIOR CERTIFICATE**

**IBANGA 12**

**SEPTEMBER 2010**

**ISIXHOSA ULWIMI LWASEKHAYA – IPHEPHA LOKUQALA**

**AMANQAKU: 70**

**IXESHA: 2 iiyure**



---

Olu viwo lunamaphepha ali – 11.

---



**IMIYALELO KUNYE NENGCOMBOLO YOLWAZI:**

1. Eli phepha lahlulwe langamacandelo AMATHATHU ami ngolu hlobo:

ICANDELO A – UVAVANYO LOKUQONDA	(30)
ICANDELO B – ISISHWANKATHELO	(10)
ICANDELO C – ULWIMI	(30)
2. Funda yonke imiyalelo ngocoselelo.
3. Phendula yonke imibuzo.
4. Qala icandelo ngalinye kwiphepha elitsha.
5. Krwela umgca ekupheleni kwecandelo ngalinye.
6. Nombola impendulo nganye kanye ngokwendlela enonjolwe ngayo kwiphepha lemibuzo.
7. Shiya umgca emva kwempendulo nganye.
8. Bhala ngokucekileyo nangokucacileyo.
9. Qwalasela ngokukodwa upelo nolwakhiwo lwezivakalisi.



**ICANDELO A: UVAVANYO LOKUQONDA****ISICATSHULWA A****UMBULO 1**

Funda eli nqaku lingezantsi uze wandule ukuphendula imibuzo elandelayo.

**BATHIWE JIZE NGEMALI YOKUFUNDA**

1. Imfundo enomsila ibonakala iliphupha elimfiliba kuninzi lwabantwana abasuka kumakhaya angathathi ntweni, ingakumbi abo basuka ezilalini. Loo nto ikhokelela ekubeni abantwana baphumelele nje ibanga leshumi bakugqiba bahlale emakhaya kunzima ukuqesheka ngenxa yokuswela izakhono. Kodwa le ngxaki eye ithwaxe uqoqosho, urhulumente uzimisele ukuhlangabezana nayo ngokuthi axhobise abafundi ngobuchule nezakhono ezidingekayo. Kutsha nje umphathiswa weSebe leMfundo noQeqesho uMahlubandile Qwase unikezele ngenkxaso-mali (bursaries) kubafundi abalikhulu elinamashumi amathandathu anesithoba(169) kubafundi abasuka kwizikolo eziphantsi koomasipala baseKumkani Sabata Dalindyebo, Mhlontlo naseNyandeni. Umsitho wokunikezela ngale nkxaso ububanjelwe kwiholo yaseO.R. Tambo eMthatha ngomhla we-12 kule imiyo. Le nkxaso-mali ekwizigidi ezithathu nemivo (R3.3 million) isuka kwiEducation Training & Development Practices Seta (ETDP SETA) yaseMpuma-Koloni.
2. Umlawuli wakwa ETDP SETA, uNkosikazi Nombulelo Nxesi, uthe oku kukuzalisekisa izithembiso ezenziwa kwi-imbizo eyayibanjelwe kuTsolo kunyaka ophelileyo. “Sathembisa ukukhupha imali yokufunda kubafundi abathe baphuma phambili kwizikolo zabo. Sijonge ikakhulu kwizikolo ezisezilalini. Siye sathatha abafundi abahlanu abenze kakuhle kwiimviwo zebanga leshumi (Grade 12) sijonge kwizikolo ezingamashumi amathathu anesithathu ezazimelwe kuloo mbizo. Umfundi ngamnye uza kuxhaswa ngamashumi amabini amawaka eerandi (R20 000) kunyaka wakhe wokuqala esedyunivesithi. Sibone ukunqongophala kwezakhono kwiinkalo ezifana nezibalo, ubunzululwazi, ezoqoqosho, kwiilwimi zesiNtu, ezolimo nakubuchwepheshe kwezekhompuyutha. Siyabakhuthaza abafundi ukuba bazame ukusebenza nzima kwizifundo zezibalo nezobunzululwazi.”
3. Umphathiswa uQwase ubakhuthazile abafundi ukuba bazimisele besebenzela impumelelo ukuze baphucule ubomi babo nobeentsapho zabo. Uhambise wathi kukho ukwehla kwamanani abantu abaqeqeshelwe ubunjineli nolimo-kungako nje abafundi kufuneka bazimisele kwizifundo zobunzululwazi nezibalo kuba ngaphandle kwazo anqabile amathuba okungena kwezi nkalo zobugcisa. Uthe nabefundisi-ntsapho mabazinike ingqwalasela ekhethekileyo ezi zifundo.
4. Ukanti uMbulelo Moeli onguMlungelani wezeMfundo kumbutho iSouth African Democratic Teachers Union ePhondweni uthe abazali mabazikhathaze ngemfundo yabantwana babo babancedise ngandlela zonke kumsebenzi wabo.

5. Kudliwano ndlebe neKhwezi, uYolanda Ponco ophume phambili kwisikolo iGxaba eNgqeleni nokhule engenabazali uthe, “Ndibulela urhulumente ngokusifundisa kuba liza kutsho lizaliseke iphupha lam lokuba ngumsasazi.” UPonco uza kuqhuba izifundo zePublic Relations Management kwiDyunivesithi iWalter Sisulu eMthatha. Nabazali bavakalise imincili yinto abayenzelwe ngurhulumente kuba bekungazukuba lula ukuba abantwana baqhubele phambili nezifundo ngenxa yentswelo nokuhamba nzima.- Monwabisi Khininda.

**[Lithatyathwe kwiphepha-ndaba i-IKhwezi likaJanuwari 2010 iphepha lesi-5 laza lahlelwa lalungiselelwa olu viwo].**

- 1.1 1.1.1 Jonga kumhlathi 1.  
Yintoni ebangela ukuba abantwana abaphumelele ibanga leshumi bangaqesheki? (1)
- 1.1.2 Urhulumente uthembisa ngokuyisombulula njani le ngxaki uyichaze ku-1.1.1? (1)
- 1.1.3 Leliphi iqumrhu elinikezele ngenkxaso-mali kubafundi? (1)
- 1.1.4 Nika igama elichaseneyo nelo likrwelelwe umgca kumhlathi wokuqala. (1)
- 1.1.5 Chaza umfanekiso-ngqondweni ozotywa ligama **umsitho**. (1)
- 1.1.6 Jonga kumhlathi 3.  
Ziziphi izifundo eziBINI ekugxininiswe kuzo ngumphathiswa uQwase kuphuhliso lwezakhono ekuthethwa ngalo kweli nqaku? (1)
- 1.1.7 Bhala esi sivakalisi silandelayo sibe kwimo elandulayo.  
Umphathiswa uQwase ubakhuthazile abafundi. (1)
- 1.1.8 Ucinga ukuba yintoni ebangela ukuba kugxilwe kubafundi abasuka ezilalini kule nkxaso-mali kuthethwa ngayo kweli nqaku? (2)
- 1.1.9 Jonga kumhlathi 4.  
Bhala i-akhronimi yegama ‘South African Democratic Teachers Union’ . (1)
- 1.1.10 Bhala esi sivakalisi silandelayo sibe kwingxelo-ntetho.  
“Ndibulela urhulumente wam ngokusifundisa kuba liza kutsho liphumelele iphupha lam lokuba ngumsasazi.”  
Qala ngolu hlobo: UYolanda uthe... (2)
- 1.1.11 Jonga kumhlathi 5.  
UYolanda Ponco wafumana inkxaso-mali kuba:  
A. Ezalana nalowo ukhupha inkxaso-mali.  
B. Wayelibhinqa phakathi kwamadoda.  
C. Wayephume phambili kwizifundo zakhe. (1)
- 1.1.12 Usakuba ufunde eli nqaku ungabacebisa ntoni abafundi abanqwenela ukuya edyunivesithi babe abazali babo bengathathi ntweni? (2)
- 1.1.13 Ucinga ukuba babe kweyiphi imo abafundi ngela xesha bathiwa jize ngemali yokufunda? Nika isizathu sempendulo yakho. (2)

**[17]**

1.2 Funda esi sicutshulwa singezantsi wandule ukuphendula imibuzo elandelayo.

### ISICATSHULWA B

#### IYURE ZEKHANDLELA ZIHLAWULE

1. UMFUNDI WEMATRIKI uMiseni Dladla wayezimisele kakhulu ukufezekisa iphupha lakhe lokuba ngutitshala kangangokuba wachitha iiyure ezininzi efunda ngekhandlela. UMiseni uphuma kwilali ekufutshane neHluhluwe kumantla ePhondo iKwaZulu-Natal.
2. Ukuze afezekise iphupha lakhe, uDladla oneminyaka eli-17 obefunda kwisikolo semfundo ephakamileyo iSiphosabadletshe uncame ukudlala nabahlobo, ukuthandana, wazinxwema nakwiziyobisi. Wachitha ixesha elincinane ekwaluseni iimpahla ukuze akwazi ukuchitha iiyure ezisibhozo ubuncinane kwizifundo zakhe.
3. Ukusebenza nzima kwakhe kube nomvuzo. UDladla uyoyisile yonke imiqobo ebiphambi kwakhe waza waba ngomnye wabafundi bematriki abangama-20 abaphume phambili kwiphondo. Ufumene indawo yesihlanu kwisithili sase-Obanjeni. Uzuze oo-A kwisiNgesi, isiZulu, izifundo kwezoShishino, ezoKhenketho, iziBalo (Mathematical Literacy), noo-C kwezoQoqosho nezifundo ngezoBomi.
4. “Ndiyavuya. Ndisebenze nzima ngenene, kodwa andikhange ndikulindele oku,” utshilo. “Ndandivuka ngeyesithathu kusasa yonke imihla, ndilungise izidlo, ndincedise nomama kwimisebenzi yekhaya...Ndandifunda iyure phambi kokuba isikolo siqale.”
5. “Ndandikhawuleza ndigoduke kusakuphuma isikolo ndileqa ukuya kuqokelela iimpahla, ze emva koko ndifunde iincwadi zam de kube sezinzulwini zobusuku. Ikhaya lethu elisezifama lincinane kakhulu kwaye akukho manzi abalekayo nambane. Ebusuku ndandifunda ngekhandlela.”
6. Le titshala yangomso ithe imali ngowona mqobo uxabe endleleni yayo. Yongeze ngelithi inethemba lokufumana isipho-mali. Ndifuna ukuba ngutitshala ukuze ndizise uthando kwinkonzo yobutitshala.” - *Subashni Naidoo*.

**[Ithatyathwe kwiSunday Times yomhla wesi-4 kweyoMqungu 2009 yaza yaguqulelwa esiXhoseni yalungiselelwa olu viwo.]**


- 1.2 1.2.1 Jonga kumhlathi 1.  
UMiseni unqwenela ukuba yintoni ebomini bakhe? (1)
- 1.2.2 Jonga kumhlathi 2.  
Balula umceli-mngeni ube mNYE owawunokumphazamisa uMiseni angaziphumeleli izifundo zakhe. (1)
- 1.2.3 Yintoni oyifundileyo kwesi sicutshulwa engakwakha nawe njengomfundi?  
Nika imfundiso ibe NYE. (1)
- 1.2.4 Ingaba le ntetho ilandelayo **yinyani** okanye **asiyonyani**? Zixhase.  
Abafundi abafumana oo-A kwizifundo zabo ngabafundi abafunda nabahlala ezidolophini apho kukho izixhobo zokufunda nokufundisa nombane. (2)

1.2.5 Ingaba imchaphazela njani umfundi kwizifundo zakhe nakwisimo sakhe into yokuzinikela kwiziyobisi? Nika ingongoma ibe-NYE kwimeko nganye. (2)

1.2.6 Jonga kumhlathi 5.  
Caphula isivakalisi esibonisa ukuba uMiseni wayengenalo ixesha lokudlala nabahlobo bakhe. (1)  
[8]

### ISICATSHULWA C

1.3 Qwalasela le grafu ilandelayo uze uphendule imibuzo esekwe kuyo:



*Ezinye: IsiPhuthukezi, IsiJamani, IsiDatshi, IsiTelugu, IsiTamili, IsiUdu, nesiTshayina.*

1.3.1 Loluphi olona lwimi luthethwa ngabantu abaninzi phakathi kwesiXhosa nesiNgesi ngokwegrafu? Xhasa impendulo yakho ngokucaphula ubungqina kwigrafu. (2)

1.3.2 Olona lwimi luthethwa ngabantu abaninzi loluphi ngokwegrafu? (1)

1.3.3 Zingaphi iilwimi ezisemthethweni apha eMzantsi Afrika ngokolwazi lwakho loMgaqo-siseko naxa ujonge kule grafu? (1)

1.3.4 AmaXhosa alujongele phantsi ulwimi lwawo kakhulu. Ucinga ukuba ingaguqulwa njani le meko lisebe leMfundo? Nika ingongoma ibe NYE. (1)  
[5]

**AMANQAKU ECANDELO A: 30**



**ICANDELO B: ISISHWANKATHELO****UMBUZO 2**

Shwankathela le ntetho ilandelayo yesithethi sembeko ngamagama angama – 60 ukuya kuma – 70 ukulungiselela ingxelo oza kuyinika.

Landela le miyalelo:

- **Dwelisa** okanye ubhale ngokomhlathi iingongoma eziphambili eziphuhlisa umxholo wesicatshulwa zibe siXHENXE usebenzise awakho amazwi nezivakalisi ezipheleleyo. (7)
- Sebenzisa iimpawu zobhalo ngokuchanekileyo. (Upelo, ulwahlulo-magama, igrama nezinye) (3)
- Bhala inani lamagama owasebenzisileyo ngokuchanekileyo. [10]

**ULUTSHA NGUMQOLO WESIZWE**

1. Amaciko adla ngokuthi xa ethetha, ukuba ubani ufuna ucwambu lwesizwe makalukhangele kubantu abatsha. Kude kubekho nenkolelo yokuba abantu abatsha baziinkokheli zangomso. Kungesi sizathu ke le nto ulutsha kubonakala ngathi lubekwe esweni nasentendeni yesandla. Uthi kutheni wena le nto ulutsha lude lunikwe nethuba lokumela amalungelo alo ngurhulumente? Kaloku kunkcenkceshelwa izithole ukuze zikhule, zimil' iingcambu, zime zithi gomololo naxa sekuvuthuza imimoya.
2. Xa umtsha ke uthi ube namaphupha neminqweno emininzi. Imfundo ke kuphela kwebhulorho enokuthi ikuwezele empumelelweni. Akubi lula ke kambe; zikho kaloku izigingqi nezabatha ezibuthume endleleni nezithi zimphazamise umfundi esajonge phambili njalo. Ukuba ke usisiyatha uya kuba lixhoba nesisulu sezo zabatha kodwa ukuba uvul'amehlo uya kushiyeke ufumbethe amaduna namathokazi.
3. Kwiingxaki ezithi ziphazamise ulutsha singabalula uxinzelelo loontangandini; ukufuna ukwamkeleka kubahlobo; ukufuna ukungcamla izinto lingekafiki ixesha loko; iziyobisi, utywala, nesifo uGawulayo. Zonke ezi zinto zingakhokelela ekubeni umnt' omtsha azibhaqe sele ephuncukwa yingqeqesho yekhaya lakhe, aqale ukuhamba iindibano zolonwabo.
4. Abafundi ke bona batsho bafumane ukuphazamiseka mpela esikolweni. Kulapho ke athi afunde khona ukungcamla zonke izinto de aye kutshona kwazembe litshona nomphini. Xa ezithethelela ke urheme uya kumva esithi, "ndidl'ubutsha bam!", bambi ubeve besithi, "bubom sana!" Kweso sithuba utsho uqikelele ke ukuba amaphupha nezifungo zinokuba zisabekwe bucala. Ayabhanga kaloku amaphupha xa uzihlobanise nebhote, xa uzibhubhisa ngeziyobisi naxa ungu 'Bubele' okanye u'Nobubele' ohamba encuma de abelane ngesondo naye wonke umntu odibana naye.

5. Siba krakra ke isiphumo sayo yonke le nto. Ufunda isifundo esibuhlungu, ushiyeke uzisola ngobuyatha.
6. Bakho kaloku abo basawafumbetheyo amaphupha abo. Bona bazimisele ukufunda kuba bayazi ukuba ixesha lokonwaba liyeza xa sele umntu eziphangelela.
7. Kulungile ke ukuhamba iindibano zolutsha kuba kulapho ufunda khona izinto ezininzi ezakhayo. Uluntu ngokubanzi lunoxanduva olukhulu lokuzama ukusindisa abantu abatsha kumagongqongqo aqwengayo eli lizwe.

**[Ithatyathwe ku-Ukhanyo, iphepha le-103 nguF. Sotashe nabanye yaze yalungiselelwa olu viwo.]**

**AMANQAKU ECANDELO B: 10**

**ICANDELO C: ULWIMI****UMBUZO 3**

Qwalasela esi sibhengezo-ntengiso uze uphendule imibuzo elandelayo.

**NGQONDI BOOKSTORE!!**

Zifumanele ZONKE iincwadi zesiXHOSA!!

***IINOVELI!! IMIDLALO!! AMABALI AMAFUTSHANE!!  
ISIOBE!! ISIKHOKHELO SEEMVIWO!!***

*Ababhali ngooMakhwekhwetha!! Abevi beemviwo zesiXhosa!!  
Amaxabiso athotywe ngama-50 epesenti!  
Khawuleza isisulu siyaphela ngomhla wama-20 kuSeptemba!!*

***“BONKE ABATHENGA IINCWADI KWANGQONDI BABA ZIINGQONDI”***

***Abantu abakrelekrele bathenga iincwadi kwaNgqondi bookstore!***

***IMBILA YASWELA UMSILA NGOKUYALEZELA! WALALA WASA – A – LA !!***

Umnxeba: 083 586 1390

Feksi: 047 537 1919

- 3.1 Yintoni ebhengezwa kwesi sibhengezo? (1)
- 3.2 Ingaba umbhali wesi sibhengezo-ntengiso ukwazile ukusebenzisa ifonti njengesixhobo sokuloba abathengi? Zixhase. (1)
- 3.3 Chonga iqhalo elisetyenziswe kwesi sibhengezo uze ulisebenzise kwisivakalisi kuphuhle intsingiselo yalo. (2)
- 3.4 Umfanekiso womntu okwesi sibhengezo usetyenziswe ngayiphi injongo? (1)

**[5]**

**UMBUZO 4**

Ingaba zenze msebenzi mni izimamva ezikrwelelwe umgca ngaphantsi kwezi zivakalisi zilandelayo?

- 4.1 Uya kufika eli gezazana linyolana nalo mntwana xa kungekho titshala. (1)
- 4.2 Umzuzwana nje iphumile ititshala yabo, bona bashiyeka bekruthakruthana. (1)
- 4.3 Yakha isivakalisi usebenzise isiqu sesenzi u-**hlambel**-sithabathe iinjongosenzi ezimbini. Zikrwelele iinjongosenzi ozisebenzisileyo. (1)
- 4.4 Izakhi ezikrwelelweyo kwesi sivakalisi silandelayo zibonisa ntoni?
- Thenga kwaNgqondi. Buza kuNgqondi yonke into. (2)

**[5]****UMBUZO 5**

- 5.1 Izenzi ezibhalwe ngqindilili zibonisa eliphi ixesha kule ntetho yesi sibini ilandelayo:

Lizeka:	Indlela ofunda ngayo Spinatshi kule kota ibonisa ukuba <b>uza kuliphumelela</b> eli banga kulo nyaka.
Spinatshi:	Ndilwa intsin' emva kwam ouleyidi! Kudala amalanga etshona ndifunda eli banga. Ngunyaka wesi-4 lo. <b>Zifundile</b> zonke iintanga zam ezinye zazeka.
Lizeka:	Yonke into inxesha layo toto. Undoqo kukuzimisela kuyo yonke into oyenzayo.

(2)

- 5.2 Guqula esi sivakalisi silandelayo sibe kuhlobo lokuyalela:  
Abantwana mabafunde ngokuzimisela. (1)
- 5.3 Dibanisa ezi zivakalisi zilandelayo wakhe isivakalisi esinye esixandileyo.  
UTHoko ubophe ibhanti.  
Oko ukwenzela abantwana bakhe.  
UTHoko uyabathanda abantwana bakhe. (2)
- 5.4 Bhala esi sivakalisi silandelayo ngohlobo oluya kunika intsingiselo evakalayo:  
Ngokuzimisela bayavuzwa abafunde konyaka abafundi ekupheleni. (1)
- 5.5 Sebenzisa igama u-krwada kwizivakalisi eziBINI ziphuhlise iintsingiselo ezahlukeneyo. (2)
- 5.6 Nanku umntwana ethetha into engaviwayo ngumzali. Njengomntu omtsha oyaziyo le ntetho yakhe, nceda utolikele olu sizana lomzali amagama abhalwe bukekela nangqindilili kule ntetho yale ntwana:

Sipoponi: **Ugrand Ta** Vick?  
Victor : Ndigrand sani. Ugrand?

(2)

**[10]**

**UMBUZO 6**

- 6.1 Ingaba izimaphambili ezikrwelelweyo kule ntetho ingezantsi ziphuhlisa ntsingiseloni?

Indebe yehlabathi ifikile yadlula nezinto zayo. Uluntu loMzantsi Afrika lufunde lukhulu. Ubuntu bama-Afrika bona soze bulibaleke.

(2)

- 6.2 Tshatisa intsingiselo ephuhliswa ligama elibhalwe ngqindilili kwizivakalisi eziKULUHLU A kunye neentsingiselo ezinikwe KULUHLU B.

ULUHLU A	ULUHLU B
6.2.1. <b>Ukuzabalaza</b> kukaSolani ethengisa iinkuni nombona kube nomvuzo kuba abantwana bakhe ubafundisile bonke.	A. Eze ngenxa yefuthe lezepolitiki.
6.2.2. Abantu <b>abazabalazela</b> eli lizwe loMzantsi Afrika ngabo abenze ukuba indebe yeHlabathi idlalelwe kweli.	B. Erheshayo C. Eyentsusa

(2)

- 6.3 Nika igama elinye endaweni yebinzana elikrwelelwe umgca ngaphantsi kule ntetho ilandelayo:

Abantu ebebethunyelwe ngamazwe ngamazwe ukuza kujonga imeko kweli loMzantsi Afrika babuye bonelisekile ngamalungiselelo eNdebe yeHlabathi.

(1)

- 6.4 Funda lo mhlathana ungezantsi uthi uze ulungise iziphene ezifumaneka kuwo. Bhala igama elinesiphene kuphela ulilungise.

izikolo ngamaziko okwakha abafundi. Kunyanzelekile ke ngoko ukuba abafundi bathobele imithetho nemiqathango ebekwe ezikolweni xa befuna inphumelelo.

Ukuba ke wena uyindladiya ephazamisayo xa kufundiswa ubulala elakho ikamva. Abaphulaphulayo bona bazakuphumelela baboqhithhe abo bangaphulaphuliyo.

Kulo ka-2010 baninzi abafundi abazimiseleyo.

(5)

**[10]****AMANQAKU ECANDELO C: 30****AMANQAKU EWONKE: 70**





